

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ZAKLJUČAK

odbacuje se Prijava namjere koncentracije privrednog subjekta Klas d.d. Sarajevo radi nepostojanja obaveze podnošenja iste, u smislu odredbi Zakona o konkurenciji

Sarajevo
April 2007. godine



Broj: 01-04-26-002-6-II/07
Sarajevo, 25.04.2007. godine

Na osnovu člana 42. tačka g) Zakona o konkurenciji («Službeni glasnik BiH», broj 48/05), a u vezi sa članom 14. Zakona o konkurenciji, i člana 116. stav (2) Zakona o upravnom postupku («Službeni glasnik BiH», broj 29/02) po Prijavi namjere koncentracije podnesenoj od strane privrednog subjekta Klas d.d. Sarajevo, Paromlinska 43, 71000 Sarajevo, zaprimljenoj dana 16.01.2007. godine pod brojem 01-04-26-002-II/07, Konkurencijsko vijeće, na 45. (četrdesetpetoj) sjednici održanoj dana 25.04.2007. godine, je donijelo

Z A K L J U Č A K

Odbacuje se Prijava namjere koncentracije privrednog subjekta Klas d.d. Sarajevo radi nepostojanja obaveze podnošenja iste, u smislu odredbi Zakona o konkurenciji.

O B R A Z L O Ž E N J E

Privredni subjekt Klas d.d. Sarajevo, Paromlinska 43, 71000 Sarajevo (u daljem tekstu: Klas ili podnosilac Prijave) je dostavio Konkurencijskom vijeću Prijavu namjere koncentracije, zaprimljenu pod brojem 01-04-26-002-II/07 dana 16.01.2007. godine, koja će nastati na tržištu Bosne i Hercegovine sticanjem kontrole privrednog subjekta Klas nad privrednim subjektom Mlin «Husinski Rudar» d.d. Ljubače, 78000 Tuzla (u daljem tekstu: Mlin) kupovinom većine dionica.

Uvidom u dokumentaciju priloženu uz Prijavu namjere koncentracije (u daljem tekstu: Prijava), a u skladu sa članom 30. Zakona o konkurenciji i Odlukom o načinu podnošenja prijave i kriterijima za ocjenu koncentracije privrednih subjekata («Službeni glasnik BiH», broj 95/06) Konkurencijsko vijeće je utvrdilo da Prijava nije kompletna, jer nisu dostavljeni finansijski izvještaji učesnika koncentracije za 2006 godinu, u smislu člana 30. Zakona o konkurenciji (u daljem tekstu: Zakon).

Na zahtjev Konkurencijskog vijeća podnosilac Prijave je istu dopunio dana 06.03.2007. godine. Konkurencijsko vijeće, u skladu sa članom 30. stav (3) Zakona, dana 04.04.2007. godine izdalo podnosiocu Prijave Potvrdu o prijemu kompletne i uredne Prijave.

Konkurencijsko vijeće ja na osnovu uvida u Prijavu i dostavljenu dokumentaciju utvrdilo sljedeće činjenice:

Učesnici predmetne koncentracije su:

- a) Privredno društvo za preradu žitarica, brašna, proizvodnju prehrambenih i konditorskih proizvoda, ugostiteljstvo i turizam, vanjsku trgovinu i trgovinu na veliko i malo Klas d.d. Sarajevo, Paromlinska 43., 71000 Sarajevo, upisano u sudski registar Kantonalnog suda u Sarajevu - Rješenje br. UF/I – 1126/02 dana 26.02.2003. godine.

- b) Dioničko društvo za proizvodnju mlinskih proizvoda Mlin «Husinski Rudar» d.d. Ljubače, Ljubače b.b., 78000 Tuzla, upisano u sudski registar Kantonalnog suda u Tuzli - Rješenje broj U/I – 1631/89 dana 29.12.1989 godine.
2. Pravni osnov predmetne koncentracije je javna ponuda za kupovinu dionica objavljena od privrednog subjekta Klas, dana 08.01.2007 godine, u dnevnim listovima «Oslobođenje» i «San», za kupovinu ukupno (..)**dionica privrednog subjekta Mlin čime bi privredni subjekt Klas stekao učešće od (..)**¹% u vlasničkoj strukturi privrednog subjekta Mlin.
 3. Pravni oblik koncentracije je sticanje kontrole privrednog subjekta Klas nad privrednim subjektom Mlin kupovinom većine dionica, u smislu člana 12. stav (1) tačka b) pod 1) Zakona.
 4. Ukupan godišnji prihod učesnika koncentracije za 2006. godinu iznosi:

R.b.	Naziv privrednog subjekta	Ukupan prihod (KM)
1.	Klas d.d. Sarajevo	(..)**
2.	Mlin «Husinski Rudar» d.d. Ljubače	(..)**

5. Analiza relevantnog tržišta

Relevantno tržište, u smislu člana 3. Zakona, te čl. 4., 5. i 6. Odluke o utvrđivanja relevantnog tržišta («Službeni glasnik BiH», broj 18/06) čini tržište određenih proizvoda /usluga koje su predmet obavljanja djelatnosti na određenome geografskom tržištu.

U predmetnoj koncentracije relevantno tržište je proizvodnja i prodaja mlinskih proizvoda (pšeničnog brašna) u Bosni i Hercegovini.

U Bosni i Hercegovini je registrovano preko 50 preduzeća za proizvodnju mlinskih proizvoda od čega 36 na području Federacije Bosne i Hercegovine i 14 na području Republike Srpske i Brčko Distrikata Bosne i Hercegovine.

Pored učesnika koncentracije proizvodnjom i prodajom mlinskih proizvoda na relevantnom tržištu djeluju, između ostalih:

- «Rebonja» d.o.o. Doboj Istok
- «Eurotrans» d.o.o. Gradačac
- «Mlinorad» d.o.o. Čelić
- «Mlin produkt» Bijeljina
- «Žitopromet-drina» a.d. Zvornik
- «Krehić» d.o.o. Zenica
- «Dukat» d.o.o. Jeljah-Tešanj
- «Žitopromet» d.d. Mostar
- «Mlinpek» d.d. Bugojno
- «Mlin» MPI d.d. Ust ikolina
- «Mlin Majić» d.o.o. Prud.

Analizom podataka iz Prijave je utvrđeno da potreba Bosne i Hercegovine za pšeničnim brašnom u 2006. godini je iznosila 420.912 tona.

Učešnici koncentracije u 2006. godini su proizveli i plasirali ukupno 56.473 tona pšeničnog brašna i imaju zajednički tržišnog učešća od 13,42% na relevantnom tržištu Bosne i Hercegovine, odnosno privredni subjekt Klas je proizveo i plasirao 50.997 tona pšeničnog

¹ (..)**- Podaci predstavljaju poslovnu tajnu

brašna i ima 12,1% tržišnog učešća, dok privredni subjekt Mlin 5.476 tona ili ima 1,3% tržišnog učešća.

Konkurencijsko vijeće, u skladu sa navedenim podacima, je utvrdilo da jedan od učesnika koncentracije odnosno privredni subjekt Mlin nije u prethodnoj godini ostvario ukupan prihod od najmanje 5.000.000,00 KM odnosno da njihovo zajedničko tržišno učešće na relevantnom tržištu Bosne i Hercegovine ne prelazi 40,0%, što su u skladu sa članom 14. stav (1) pod b) Zakona, uslovi za obavezu prijave namjere koncentracije

Na osnovu izloženog Konkurencijsko vijeće je odlučilo kao u dispozitivu ovog Zaključka

Administrativna taksa

Na ovaj Zaključak podnosilac Prijave u skladu sa članom 2. tarifni broj 108. stav 1. pod c) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», broj 30/06) je obavezan platiti administrativnu taksu u iznosu od 1.000,00 KM u korist Budžeta institucija Bosne i Hercegovine.

Pouka o pravnom lijeku

Protiv ovog Zaključka nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovog Zaključka odnosno od dana njegovog objavljivanja u «Službenom glasniku Bosne i Hercegovine»

Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

Predsjednik

Gordan Raspudić